

Engari he wa tona, ka tahuri ai tatou te iwi nui tonu ki te whakahaere i tenei take, kia riro ai ma tena iwi, ma tena iwi, tana wahi tana wahi. Kua kiia hoki tenei kura no te motu katoa, a ko te wawata o etahi o nga maramatanga i roto i a tatou kia waiho a Te Aute a tona wa e takoto mai nei, hei kura nui mo te iwi Maori, ara hei "University."

TE WHAKAPUARETANGA.

Na Atirikona Hapata Wiremu i whakahaere te Karakia, he maha hoki nga Minita i tu atu hei hoa mona.

Na te Kawana-Tianara i whakapuare nga tatau, nana ano hoki i hura te whakaahua peita o atirikona Hamiora Wiremu, te kaumatua nana i whakatakoto nga kaupapa tuatahi, i mohiotia ai a Te Aute hei taonga whakamiharo mo te iwi Maori.

I roto i nga kupu whakamihia a te Kawana-Tianara, i whakatu ia i te pouri o tana hoa wahine mo tana korenga e tae mai i tenei ra i tona mate. Nui atu te aroha o tona hoa ki te iwi Maori me te tumanako kia pai te whakatipu o te iwi Maori a nga wa e takoto mai nei. He wahine mohio tona hoa ki nga korero mo te iwi Maori, he ahua mohio hoki ki te reo Maori.

Ko te Hooro kua whakapuaretia nei, he pena tona ahua me te manawa o te tangata. Kei konei te manawa e ta ana, engari ko nga toto, me ona painga ka haere ki nga wahi katoa i noho ai te iwi Maori.

Katahi ka tahuri iho te Kawana ki nga tamariki, ka ki:—"E ta ma, titiro marama atu ki mua i o koutou aroaro. Kuaa hei teretere noaiho i runga i te kare o nga wai. Kia marama te titiro ki mua. Kia u te whakaaro, kia pakari. E whai ki te taumata honore o te matauranga. Ki te kore e taea, kaore koe e whakama mehemea i whakapau koe i to kaha. Kia mahara ki to Kareti, a, a te wa e uru ai koe ki nga mahi o te ao, kia hoki mai o mahara ki to Kareti, kia whiwhi hoki to kareti i te honore i runga i au mahi. Kia pono to mahi ki to kura, ki to Kingi, ki to whenua. Kotahi te mea nui rawa kei wareware i a koe, ko te wehi, ko te aroha o te Atua. Kia mau ki tenei i roto i o mahi katoa."

He nui te whakamihia ki te papai o nga korero a te Kawana, me te kaha o tona aroha ki nga tamariki o te iwi Maori. Te huinga atu ki roto i te Hooro, ka mutu te himene, ka tu mai a Atirikona Hapata, ka mihi ki a Te Wiremu, ki a Te Tatana, me nga kai-whakahaere o te kura. Ko tana kupu nui, he whakahoki nana i te taumu a nga pakeha e ki nei, he iwi mangere te Maori.

I whai kupu ano hoki a Ta Maui Pomare mo te pai o te Kawana-Tianara ki te haere mai ki te whakapuare i Te Aute. I mihi ia ki nga Kai-tiaki o te Te Aute mo te otinga pai o te Kareti. I whakahe ia mo te kore rawa o etahi whakairo Maori, tuhituhi ranei, e kitea ki roto i nga whare hou o Te Aute. I whakaatu ano ia i te ahua o te Kura i ona ra.